

## 2 JON

### Warage o Ayeet Jon Een Ram

**1** <sup>1</sup> Aneeta Jon o keen mayan ole o tuwento. Kayeedekin warage nico ineet ɲaa o eɲerawin Jooi ineet kibeen dɔl ugun. Kareezuɲ naana igeeta didi, bar alaɲ zin kareezuɲ naana doon, bar buk areezuɲ igeet ɔl dook o agaac gi ween didi. <sup>2</sup> Mazin giye o kagayi naaga gi ween didi, amena tiɲeere zɔɔz nici abil ɲaaten ageet nɔkɔ kodot.

<sup>3</sup> Abon bai anyet Jooi ween baatinai kibeen ɲeerin Yesu Kiristo ageet deten ki tirten been ganɔn, ka zin kabaayit naaga leeminta been rɛɛzɔnta.

#### Abaayit leeminta been rɛɛzɔnta

<sup>4</sup> Katalne naana ɔɔɔt ɛle giye baal kiiya kojowaye dɔl ugun oogi abaak gole ween didi ebaal aricaneket baatinai ageet e. <sup>5</sup> Inoko zin karoonyin ineet kerɛɛzɔ naaga dook. Nicini alaɲ een lotinet ci colai kayeedekuɲ naana igeet, bar lotinet baal iziiktu laadun e. <sup>6</sup> Mazi kareez naaga Jook didi, abon kazooni naaga lotinet o aricaneket niini ageet. Iziiktu zin baale laadun azi niini ne, “Abaayit niiga dook rɛɛzɔnta.”

<sup>7</sup> Iziiyit di gima ce. Anyak ɔl ci meel uuwak vɔlɔɲ ci alaban ɔl, ma inoko azaantozek niigi looc nico dook. Azi niigi ne, “Alaɲ Yesu Kiristo baale aku alye ci eet ci deer.” Ma ɛeti ci abil nɔkɔ eet ween labjoi, ma amarnin Kiristo neen. <sup>8</sup> Uzuuti zin niiga eeleeti ugooc ka calaɲ akulunu vɔyit o liɲliɲon unooɲ Joowa, bar abon agenyu ka ojokta kaal dook o ka kanyuɲ niini igeet.

<sup>9</sup> Ma ɛeti ci awɔyi gi ci ɔɔ cin doon, ma alaɲ aliɲliɲi demziin o Kiristo, alaɲ niini aavi ɲaaten Jook. Maje ɛeti ci aavi demziinte o Kiristo, aavi niini ɲaaten baatina kibeen ɲeerin. <sup>10</sup> Zin mā anyak eet ci akunakuɲ igeet, ma alaɲ anyaakuɲ demziin o Kiristo, ma bar anyaakuɲ niini igeet demziin cin doon, má anyeku nɔɔnɔ kiiyak ceezi ugooc. Buk má azaayu niiga nɔɔnɔ been neen. <sup>11</sup> Eeci mā azaa ɛeti nɔɔnɔ, ozolit koca buk niini ki nɔɔnɔ kaal o ger agɔɔn niini.

<sup>12</sup> Kanyei kaal ci meelik karoony kuduwayuɲ, bar zin alaɲ karoony keteyeedeɲuɲ igeet kaal nicoko waragewa, eeci karoony naana alya kook kicinuɲ ka kozoozɔ naana kibeen igeet ɛle, ka naaga dook katalto ɔɔɔt. <sup>13</sup> Azaayin ineet ɔl o buk aɲɛra Jooi nɔɔɔɔ ɲaato.